



# Komunikado

30 di òktober 2019

## **Cft: "Mas progreso ta nesesario den asuntunan ku pa basta tempu ta pendiente i tambe ku proyekto di presupuesto 2020"**

**Philipsburg – Kolegio di supervishon finansiero (Cft) ta ripití un biaha mas ku Sint Maarten mester realisá mas progreso ku algun asuntu ku ta pendiente, manera reforma di penshon, redukshon di gastunan di kuido médiko i reforma di servisio di impuesto. Apesar di e situashon polítiko aktual, e Kolegio ta enfatisá serka Sint Maarten pa ketu bai hasi tur loke ta posibel pa dal e pasonan nesesario i kuminsá e aña nobo ku un presupuesto aprobá.**

### **Proyekto di presupuesto 2020 i ehekushon 2019**

E proyekto di presupuesto 2020 ainda ta reflehá un défisit di 24 mion florin. Pa e motibu aki, a base di artíkulo 25 di e lei di konsenso di Reino tokante di supervishon finansiero, aprobashon di Konseho di Minister di Reino ta rekerí. E artíkulo en kuestion ta permití, bou di sirkunstansha partikular manera e konsekuensia di orkannan Irma i Maria, pa e pais por desviá for di e regla pa un presupuesto balansá. Cft ta rekomendá pa redusí e gastunan di 2020 te un nivel mas realístiko. Tambe Cft ta konsehá Sint Maarten pa kuminsá e aña presupuestario ku un presupuesto aprobá.

Relashoná ku ehekushon di presupuesto 2019, Sint Maarten ta premirá ku e lo finalisá e aña ku un défisit di 41 mion florin, loke ta mas abou ku e montante ku anteriormente a keda presupuestá (71 mion florin). Pa loke ta trata e posishon di likides, e di dos reportahe di kuartal 2019 ta indiká un montante di 84,8 mion florin na likides. Pa por bini na remarke pa sosten di likides, Sint Maarten mester kumpli tambe ku algun kondishon ku ainda e no a kumpli kuné, manera subida di e edat di penshon di empleadonan públiko di 62 pa 65, inkluso e transishon di un sistema di penshon basá riba e último suèlto pa un sistema basá riba un suèlto medio, i redukshon di salarionan di miembronan di Parlamento.

Cft a komprondé tambe ku e akuerdonan di finansiamiento ku e fondo di trust i EIB pa rekonstrukshon di aeropuerto ainda no ta firmá i e ta enfatisá un biaha mas e importansia di e rekonstrukshon di e aeropuerto pa por sigurá i sigui mehorá e perspektiva ekonómiko di e pais.

### **Asuntunan remarkabel**

Cft ta ferwagt ku den e temporada benidero Sint Maarten lo mester yega e nivel di presupuesto di 2016, esta promé ku orkan Irma, i konsekuentemente Sint Maarten mester por kumpli ku e lei di konsenso di Reino tokante supervishon finansiero. Sinembargo, pa por realisá tur esaki, mester atendé mas lihé posibel ku un kantidat di asuntu ku ta habrí ainda. Na kabes di e lista aki ta pará e reforma planeá di e servisio di impuesto. E plan aki aprel último a keda aprobá pa Konseho di Minister, pero su ehekushon ainda mester kuminsá. Ta spera ku e reforma tan antisipá aki lo kontribuí na un kresementu struktural di e entradanan di Gobièrnu. E entradanan adishonal aki entre otro lo hasi posibel pa kompensá e défisitnan aktual i esnan bieu, i redusí e atraso grandi di e pagonan kuantioso. Te ainda Sint Maarten a kumpli ku algun pago i den e quadro aki resientemente e pais a sera akuerdo ku Telem i SZV.

Otro asuntunan pendiente ta mehora di e maneho finansiero i reforma di e sistema di penshon i e sistema di kuido. Cft ta pidi atenshon spesial pa e reforma di e sistema di penshon i e sistema di kuido, mirando e konsekuensianan negativo ku esaki por trese kuné, si nan no keda manehá adekuadamente. E proyekto di lei pa e revishon di e penshon di amtenar a keda entregá na òktober 2018 na Parlamento, pero ainda e no a keda akordá. Ainda mester presentá e subida di edat di penshon di 62 pa 65 aña na Parlamento.



E falta aktual di medionan finansiero a keda menshoná komo un di e motibunanan prinsipal dikon e plan di mehora di e maneho finansiero ainda no ta ehekutá. Esaki por trese retraso kuné pa e aña 2021 ku ta akordá komo e aña den kua Sint Maarten lo mester risibí un deklarashon aprobatorio di akountent relashoná ku e aña ei. Cft ta konsehá Sint Maarten pa e hasi tur su esfuerso pa e aselerá ehekushon di e plan. Pa loke ta trata kuantanan anual di añanan anterior, e kuenta anual 2016 no a risibí un opinion positivo di e akountent, ni di Kontrolaria General di Sint Maarten. Sint Maarten ta intenshoná pa kontratá asistensia tékniko pa traha kuantanan anual 2017 i 2018, mirando ku esaki ainda no a tuma lugá. Tambe Parlamento ainda mester aprobá e kuantanan anual di 2015 i 2016.

Kolegio di supervishon finansiero Kòrsou i Sint Maarten a bishitá Sint Maarten di 28 pa 30 di òktober i a hiba kòmbersashon ku Gobernador, Minister di Finansa, Konseho di Minister, komishon finansiero di Parlamento, e miembro di e Grupo Nashonal di Guia pa Rekuperashon di Sint Maarten, Komishon di Progreso Sint Maarten i Konseho di Mantenshon di Lei.

[Fin di komunikado]

**Foto:**

Edgardo Lynch

**Teksto pa foto:**

Cft ta pidi atenshon di Sint Maarten ku ta pendiente ya pa hopi tempu.

**Nota pa redakshon – no pa publikashon**

Persona di kontakto na Cft:

Sekretariado Kolegio di supervishon finansiero  
Ray Thuis – Sekretario interino  
Telefon (+5999) 461-9081  
Email info@cft.cw  
Internet www.cft.cw

Persona di kontakto pa Prensa:

Jefka Martina  
Telefon (+5999) 512-6861